

Renobacion total por varia cuminsando fe 5 miyon florin

Cas di cultura mester 150 mil florin pa master plan pa renobacion edificio

ORANJESTAD - Vicky Arens director di Cas di Cultura hunto cu Edmond Tujeehut y Frank Croes kendenan ta curador di e subasta cu ta bay tin otro siman diasabra durante di e "Charity Show & Auction" pa salvaguardia Cas di Cultura y financia e master plan arkitectonico. Sra. Arens ta splica pakico tin mester di un master plan arkitectonico cual ta pa motibo cu, Cas di Cultura su edad ta hopi halto.

"Cas di Cultura su edificio tin 57 aña y e no ta funciona adecua mas banda di e hecho cu e tin hopi dañonan tambe door di tempo, humedad, uzo frecuente, friu, calor entre otro. E ta un custumber internacionalmente pa cada 20 aña mas o menos, renoba teatronan. Nos tin mas cu esey cu no a renoba Cas di Cultura profundamente. Claro cu nos interior a haya un "facelift" pero esey no ta conta como un cambio fundamental."

Sra. Arens a sigui splica locual cu tin como problema na Cas di Cultura. Tin "betonrot", tin



cu renoba escenario, renoba murayanan acustico pa nan resona miho atrobe, reemplaza trekkerwand cual ta manual y no ta permiti mas na Hulanda, tin biganan riba dak cu ta frustiendo y mester wordo drecha cada 5 aña profundamente cual tin costo hopi halto, renoba sistemanan di aircu y wak si e sistema cu tin pa 40 aña caba ta esun optimal pa e tempo di awo, amplia backstage, amplia oficinanan, agrega espacio di deposito, agrega asientonan, drecha visibilidad y tambe mehora nivel di servicio. "Esaki lo traduci tambe den un cambio di facilitacion, por ehempel cu

un box office, luga pa boluntarionan por keda, mas espacio patras pa personal entre otro," Sra. Arens a agrega.

Evento

E evento cu lo tin "Charity Show & Auction" ta costa 100 dollar pa persona pero 300 florin pa pareha. Y tur e placa aki ta bay na e master plan cu ta bay desaroya cu un compania renombra internacional yama, "Theater Advies BV".

"E show lo ta den un anochi hopi interesante, lo tin wine & cheese cu ta cuminsa 8or e ora e bishitante por wak e subasta y despues e show lo cuminsa



8or y mey. Tin 5 scol grandi di baile na Aruba cu ta participando cual ta Club di Movimiento, Koslov Dance Academy, Scol di baile Diana Antoinette, Simadansa y Step by Step Dance Studio. Tin tambe agrupacion Sandunga cu ta bin estrena dos hit nobo cu a caba di wordo graba. Tin Sra. Landa Henriquez cu ta bay honra nos cu presentacion di dos cantica. Sra. Joan Danies lo honra nos cu actuacion monologo y hendenan di incubator crew cual ta HipHop Aruba, tayer crea y siña cu teatro y Yo Club cu ta cinematico."

El a sigui splica cu e agrupa-

cion musical cu lo ta compañaando tur hende lo ta Carlos Bislip, Ivan Quandus y Johnny Scharbaay. Tambe lo tin un final prepara cual lo ta un "teaser" di locual cu Cas di Cultura lo kier haci den futuro cual ta musicals traduci na Papiamento. "E ta un cancion, pero cu cantantenan conoci aki na Aruba cu tur a uni forsa pa canta un musical conoci na papiamento." Ambicion di Cas di Cultura ta pa den futuro haci e musical internacional den papiamento den un teatro nobo pa luci riba tarima internacional di teatro, Sra. Arens a splica. □